

Oz ei il Di mundial dil teater



Il Di mundial dil teater

Has ti era gia udiu la construcziun: «Cala da far teater!»? Forsa che tes geniturs ni tia scolasta han detg quei, cura che ti has fatg da quei ch'ins duess buca far ... Per exempel cura che ti has fatg da clown! Ils 27 da mars has ti ina buna stgisa per far teater scosauda. Ti sas dir: «Bein, oz fetsch jeu teater! Ils 27 da mars ei numnadamein il Di mundial dil teater.» Quei di mundial dat ei dapi 1961, dapi ch'igl institut da teater internaziunal ha proclamau el. Manegiau cun teater ei cheu il giug da rollas, pia personas che giogan autras personas per raquintar ina historia sin tribuna. Quella fuorma da divertiment dat ei gia dapi mellis onns. Ils vegls Grecs han gia

giugau cumedias e tragedias. Cume dias ein tocs divertents, tragedias perencunter ein historias trestas che fineschan mal. Ils acturs purtavan mascras per giugar las differentas rollas.


In dils pli famus auturs da teater ei staus il scribent engles William Shakespeare. El ha per exempel scret il teater «Romeo e Giulietta», la historia da dus inamurai che astgan buca vegnir ensemen, perquei che lur famiglias han dispeta ina cun l'otra. Shakespeare ha scret il toc avon varga 400 onns ed il tema sco era il teater sco tal ein aunc adina actuals. Teater para pia da fascinar ils carstgauns, tuttina cura e nua sin quest mund.

Has ti gia viu ina ga in teater?

Dat ei ils 27 da mars in teater per affons en tia regiun? Enquera egl internet e va a mirar el!

Tgei teaters has ti bugen? Teaters cun poppas, cun mascras ni cun dretgas personas?

Fas ti tezza/tez bugen teater?





Lein far teater!

1

Applaus

La grupp d'affons sesa giun plaun e mira enviers igl esch ni enviers igl umbrival. In affon entra ni vegn davon igl umbrival. Ella ni el se presenta tut normal, cun in nas tgietschen ni cun ina mascra. La grupp d'affons (il public) fa applaus. Suenter ch'ils affons han applaudiu, fa igl affon ina reverenza/in enclin e sesa sper ils auters affons.


In auter affon entra cun ni senza requisit e la grupp applaudescha. Aschia va ei vinavon tochen che mintg'affon ha saviu guder igl applaus e far ina reverenza.



Pantomima

In affon elegia in animal ni ina caussa e presenta la rolla tscharnida senza discuorer ni far ramurs. Ils auters ston lignar tgei ch'ei manegiau. Era pusseivel: far pantomimas da mistregns.





Rudi d'emoziuns

La grupp stat en in rudi. In affon dat entuorn in'emoziun. Mintg'affon dat vinavon quell'emoziun alla vischina ni al vischin. Aschia va l'emoziun ina ga entuorn tochen ch'ella arriva puspei tier igl affon che ha entschiet. Uss ei il proxim affon vidlunder. Variantas per mussar l'emoziun: in'exclamaziun, mussar l'emoziun mo cun la mimica, cun moviments, sco ils animals, liun = curaschus, tgaun = cuntents, tgiat = loschs, miur = temeletga, etc.

Leger la gasetta


In affon stat d'ina vart dalla stanza e legia la gasetta. Il rest dalla grupp ei da l'autra vart dalla stanza e tscharna in'emoziun (ni in animal). En quell'emoziun entscheivan els uss a semuentar plaun en direcziun digl affon che legia la gasetta. Quel sevolva e la grupp stat eri (freeze). Sch'igl affon dalla gasetta legna da tgei emoziun ch'ei setracta, vegn midau rolla, schiglioc legia el aunc ina ga la gasetta e la grupp s'avischina puspei.


Tgi sun jeu?

Or dad ina chista cun vestgadira, requisits e mascras per setravestgir pren in affon treis caussas e tila en ellas. Ella ni el se presenta avon la gruppa d'affons e gioga ina persuna, in animal ni ina figura or dad ina historia ni in film. Ils affons ston lignar la rolla digl affon. Tgi che legna endretg, astga secostumar sco proxima ni proxim.

Mascras

Zambergei mascras da different animals cun tagliors da cartun e giughei co quels animals festiveschan ensemen.





El restaurant

Giughei ina scena el restaurant. In affon ei il hosp, in auter survecha, in tierz ei il cuschinier ni la cuschiniera ni enzatgi auter. Inventei aunc dapli rollas e giughei las differentas variantas:

- Il hosp emposta spaghettis, mo survegn in pèsch ...
- La cuschiniera ha in'assistenta ni in assistent che metta sal enstagl da zucher ella crema da vaniglia ...
- La cameriera maglia sezza nov chicken nuggets ed il hosp survegn mo pli in chicken nugget ...
- Inventei atgnas scenas!